



Broj: IP-03-47-5-07383/12VT  
Banja Luka, 13.8.2012. godine

Institut za intelektualno vlasništvo Bosne i Hercegovine (u daljem tekstu: Institut), na osnovu člana 11. a u vezi sa članom 44. Zakona o kolektivnom ostvarivanju autorskog i srodnih prava („Službeni glasnik BiH“ broj 63/10), čl. 114. i 193. stav (1) Zakona o upravnom postupku („Službeni glasnik BiH“ br. 29/02, 12/04, 88/07 i 93/09), postupajući po službenoj dužnosti, d o n o s i

## **R J E Š E N J E** **o oduzimanju dozvole za ostvarivanje prava umjetnika izvođača**

1. **ODUZIMA SE dozvola** „Sine qua non“ d.o.o., Agenciji za zastupanje i zaštitu autorskih prava, Sarajevo, Ulica branilaca Sarajeva broj 21, koju je izdao Institut za standarde, mjeriteljstvo i intelektualno vlasništvo Bosne i Hercegovine Rješenjem broj IP-5694/02 SŽ od 4.6.2002. godine, u dijelu koji se odnosi na obavljanje djelatnosti ostvarivanja prava umjetnika izvođača, na osnovu punomoći umjetnika izvođača, organizacija umjetnika izvođača ili drugog nosioca prava umjetnika izvođača.
2. Dozvola za obavljanje djelatnosti ostvarivanja prava umjetnika izvođača oduzima se sa danom **11.8.2012. godine**.
3. „Sine qua non“ d.o.o., Agencija za zastupanje i zaštitu autorskih prava, Sarajevo, dužna je da dostavi Institutu izvještaj o poslovanju, raspodjeli i utrošku sredstava zaključno sa danom važenja dozvole, u zakonskom roku.
4. „Sine qua non“ d.o.o., Agencija za zastupanje i zaštitu autorskih prava, Sarajevo, dužna je da organizaciji koja dobije dozvolu za kolektivno ostvarivanje izvođačkih prava ustupi svu relevantnu dokumentaciju neophodnu za obavljanje ove djelatnosti u roku od 30 dana od dana izdavanja dozvole.
5. Ovo rješenje objaviti u „Službenom glasniku BiH“ i u „Službenom glasniku Instituta“.

### **Obrazloženje**

Institut za standarde, mjeriteljstvo i intelektualno vlasništvo Bosne i Hercegovine, pravni prethodnik Instituta za intelektualno vlasništvo Bosne i Hercegovine, Rješenjem broj IP-5694/02-01 SŽ od 4.6.2002. godine izdao je „Sine qua non“ d.o.o., Agenciji za zastupanje i zaštitu autorskih prava, Sarajevo, odobrenje za obavljanje djelatnosti ostvarivanja prava autorâ na osnovu punomoći autorâ, punomoći organizacija autorâ ili drugih nosilaca autorskih prava, prava umjetnika izvođača na osnovu punomoći umjetnika izvođača, organizacija umjetnika izvođača ili drugog nosioca prava umjetnika izvođača.

U postupku po zahtjevu Asocijacije kompozitora – muzičkih stvaralaca BiH (AMUS) iz Sarajeva, Obala Kulina bana broj 22/II, za dodjelu dozvole za kolektivno ostvarivanje autorskih muzičkih prava Institut je Rješenjem broj IP-03-47-5-12-06059/12VT od 21.6.2012. godine oduzeo dozvolu „Sine qua non“ d.o.o. Sarajevo u dijelu koji se odnosi na obavljanje djelatnosti ostvarivanja prava autorâ na osnovu punomoći autorâ, punomoći organizacija autorâ ili drugih nosilaca autorskih prava.

Zakonom o kolektivnom ostvarivanju autorskog i srodnih prava („Službeni glasnik BiH“ broj 63/10), koji je stupio na snagu 11.8.2010. godine, dozvoljen je nastavak rada postojećim kolektivnim organizacijama pod uvjetima utvrđenim članom 44. Naime, navedenim članom u stavu (1) Zakona propisano je da organizacije autorâ i drugih nosilaca autorskih prava, te druga pravna lica specijalizirana za ostvarivanje autorskih prava koja su, prema odredbi člana 87. Zakona o autorskom pravu i srodnim pravima u BiH („Službeni glasnik BiH“ br. 7/02 i 76/06), obavljala poslove kolektivnog ostvarivanja autorskog prava prije stupanja na snagu ovog zakona nastavljaju da rade i poslije stupanja na snagu ovog zakona. Stavom (2) istog člana predviđeno je da su svi subjekti iz prethodnog stava obavezni da usklade svoj statusni oblik i svoje poslovanje sa odredbama novog zakona i podnesu zahtjev za izdavanje nove dozvole za obavljanje poslova kolektivnog ostvarivanja autorskog i srodnih prava u roku od dvije godine od stupanja na snagu ovoga zakona.

Poslovanje „Sine qua non“ d.o.o., Agencije za zastupanje i zaštitu autorskih prava, Sarajevo, bilo je predmet analize u okviru Izvještaja o funkcioniranju sistema kolektivnog ostvarivanja autorskog i srodnih prava u Bosni i Hercegovini za period od 2005. do 2010. godine, koji je usvojila Parlamentarna skupština Bosne i Hercegovine, na sjednici Predstavničkog doma održanoj 19.4.2012. godine i sjednici Doma naroda održanoj 15.5.2012. godine. U Izvještaju je, između ostalog, zaključeno da dosadašnji način poslovanja „Sine qua non“ d.o.o. nije moguće nastaviti, jer ne zadovoljava standarde u pogledu transparentnosti i demokratičnosti rada organizacije za kolektivno ostvarivanje, načina raspodjele prihoda i efikasnosti ostvarivanja zakonski reguliranog cilja.

S obzirom na to da Agencija „Sine qua non“ d.o.o. Sarajevo nije prilagodila svoj statusni oblik prema Zakonu o kolektivnom ostvarivanju autorskog i srodnih prava i da nije podnijela zahtjev za izdavanje dozvole za kolektivno ostvarivanje prava izvođača, odnosno obnovu dozvole, u zakonskom roku, koji je istekao 11.8.2012. godine, kojim bi dokazala da ispunjava uvjete propisane zakonom, a imajući u vidu zaključke Parlamentarne skupštine Bosne i Hercegovine, odlučeno je kao u dispozitivu ovog rješenja.

Nesporno je da je Agencija za zastupanje i zaštitu autorskih prava „Sine qua non“ d.o.o. dužna izvršiti isplate prikupljenih sredstava svim nosiocima čija je prava ostvarivala za period do kojeg je imala važeću dozvolu, te da je dužna sve relevantne podatke i dokumentaciju koji su neophodni za obavljanje poslova ustupiti novoj kolektivnoj organizaciji koja će ostvarivati ova prava.

Prema članu 13. stav (4) Zakona o kolektivnom ostvarivanju autorskog i srodnih prava, obavještenje o odluci o oduzimanju dozvole objavljuje se u „Službenom glasniku BiH“ i u „Službenom glasniku Instituta“, te je odlučeno kao u tački 5. ovog rješenja.

**Pouka o pravnom lijeku:** Ovo rješenje je konačno u upravnom postupku. Protiv ovog rješenja može se pokrenuti upravni spor podnošenjem tužbe Sudu Bosne i Hercegovine u roku od 60 dana od dana prijema ovog rješenja.

Direktorica  
Instituta za intelektualno vlasništvo  
Bosne i Hercegovine  
Lidija Vignjević